

摘藻堂四庫全書薈要

集部

欽定四庫全書薈要

集部

樂府詩集卷六十五

三五

詳校官候選知縣臣吳甸華



欽定四庫全書蒼要卷一萬九千七百七十六集部

樂府詩集卷六十三

宋 郭茂倩 編

雜曲歌辭

羽林郎

辛延年

漢書曰武帝太初元年初置建章營騎後
更名羽林騎屬光祿勳又取從軍死事之
子孫養羽林官教以五兵號羽林孤兒顏

師古曰羽林宿衛之官言其如羽之疾如
林之多一說羽所以為主者羽翼也後漢
書百官志曰羽林郎掌宿衛侍從常選漢
陽隴西安定北地上郡西河六郡良家補
之地里志曰漢興六郡良家子選給羽林
是也又有胡姬年十五亦出於此

昔有霍家奴姓馮名子都依倚將軍勢調笑酒家胡胡
姬年十五春日獨當壚長裾連理帶廣袖合歡襦頭上

藍田玉耳後大秦珠兩鬟何窈窕一世良所無一鬟五
百萬兩鬟千萬餘不意金吾子娉婷過我廬銀鞍何煜
燭翠蓋空踟躕就我求清酒絲繩提玉壺就我求珍肴
金盤鱠鯉魚貽我青銅鏡結我紅羅裙不惜紅羅裂何
論輕賤軀男兒愛後婦女子重前夫人生有新故貴賤
不相踰多謝金吾子私愛徒區區

羽林行

王建

長安惡少出名字樓下劫商樓上醉天明下直明光宮

散入五陵松柏中
百回殺入身合死
赦書尚有收城功
九衢一日消息定
鄉吏籍中重改姓
出來依舊屬羽林
立在殿前射飛禽

同前

孟郊

朔雪寒斷指朔風勁
裂冰胡中射鷗者
此日猶不能翩
翩羽林兒錦臂飛
蒼鷹揮鞭決白馬
走出黃河凌

同前

鮑溶

朝出羽林宮
入參雲臺
議獨請
萬里行
不奏和親事
君

王重年少深納開邊利寶馬雕玉鞍一朝從萬騎煌煌
都門外祖帳光七貴歌鍾樂行軍雲物慘別地簫笳整
部曲幢蓋動郊次臨風親戚懷滿袖兒女淚行行復何
贈長劍報恩字

胡姬年十五

劉琨

虹梁照曉日淥水泛香蓮如何十五少含笑酒壚前花
將面自許人共影相憐回頭堪百萬價重為時年

當壚曲

梁簡文帝

漢書曰司馬相如與卓文君俱之臨邛盡
賣車騎買酒舍乃令文君當盧相如身自
著犢鼻禪與庸保雜作滌器於市中郭璞
曰盧酒盧也顏師古曰賣酒之處累土為
盧以居酒甕四邊隆起其一面高形如鍍
盧故名盧當壚曲蓋取此也

十五正團團流光滿上蘭當壚設夜酒宿客解金鞍迎
來挾琴易送別唱歌難欲知心恨急翻令衣帶寬

同前

范靜妻沈氏

逶迤飛塵唱宛轉
遶梁聲調弦可以進
蛾眉畫未成

齊瑟行

歌錄曰名都美女白馬并齊瑟行也曹植
名都篇曰名都多妖女美女篇曰美女妖
且閒白馬篇曰白馬飾金羈皆以首句名
篇猶艷歌羅敷行有日出東南隅篇豫章
行有鴛鴦篇是也

名都篇

曹植

名都者邯鄲臨淄之類也以刺時人騎射
之妙游騁之樂而無憂國之心也

名都多妖女京洛出少年寶劍直千金被服光

一作麗

且

鮮鬪雞東郊

一作長安

道走馬長楸問馳驅未能半雙兔過

我前攬弓捷鳴鏑長驅上南山

一作彼南山

左挽因右發

一縱兩禽連餘巧

一作功

未及展仰手接飛鳶觀者咸稱

善衆工歸我妍歸來宴平樂美酒斗十千膾鯁胎鮓

炮鼉炙熊蹯鳴儔嘯匹侶列坐竟長筵連翩擊鞠壤巧
捷惟萬端白日西南馳光景不可攀雲散還城邑清晨
復來還

美女篇

曹植

美女者以喻君子言君子有美行願得明
君而事之若不遇時雖見徵求終不屈也

美女妖且閑采桑岐路間柔條紛冉冉葉落何翩翩攘
袖見素手皓腕約金環頭上三一作爵釵腰佩翠琅玕

明珠交玉體珊瑚間木難羅衣何飄颻輕裾隨風還顧
眄遺光采長嘯氣若蘭行徒用息駕休者以忘餐借問
女何居乃在城南端青樓臨大路高門結重關容華耀
朝日誰不希令顏媒氏何所營玉帛不時安佳人慕高
義求賢良獨難衆人徒嗷嗷安知彼所觀盛年處房室
中夜起長歎

同前

傅玄

美人一何麗顏若芙蓉花一顧亂人國再顧亂人家未

亂猶可奈何

同前

梁簡文帝

佳麗盡關情風流最有名
約黃能效月裁金巧作星
粉光勝玉靚衫薄擬蟬輕
密態隨流臉嬌歌逐軟聲
朱顏半已醉微笑隱香屏

同前

蕭子顯

章丹暫是輟舞巴姬請罷弦
佳人淇洧出豔趙復傾燕繁
穠既為李照水亦成蓮
朝酤成都酒暝數河間錢
餘光

幸未借蘭膏空自煎

同前二首

魏收

楚襄遊夢去陳思朝洛歸參差結旌旆掩靄頓駭飛變
化看臺曲駭散屬川沂仍令賦神女俄聞要宓妃照梁
何足豔昇霞反奮飛可言不可見言是復言非

闕

我帝更朝衣擅寵無論賤入憂不嫌微智瓊非俗
物羅敷本自稀居然陋西子定可比南威新吳何為誤
舊鄭果難依甘言誠易污得失定因機無憎藥英妬心

賞易侵違

同前

盧思道

京洛多妖豔餘香愛物華
恒臨鄧渠水共採鄴園花
時搖五明扇聊駐七香車
情踈看笑淺嬌深眄欲斜
微津染長黛新溜濕輕紗
莫言人未解隨君獨問家

白馬篇

曹植

白馬者見乘白馬而為此曲
言人當立功立事盡力為國
不可念私也樂府解題曰

鮑照云白馬駢角弓沈約云白馬紫金鞍
皆言邊塞征戰之事

白馬飾金羈連翩西北馳借問誰家子幽并遊俠兒少
小去鄉邑揚聲一作名沙漠垂宿昔秉良弓楛矢何參差

控弦破左的右發摧月支仰手接飛猱俯身散馬蹄狡
捷過猿猴勇剽若豹螭邊城多警急胡虜一作虜騎數遷移

羽檄從北來厲馬登高堤右驅蹈匈奴左顧陵鮮卑寄
身鋒刃端性命安可懷父母且不顧何言子與妻名編

一作壯士籍一作高名

不得中顧私捐軀赴國難視死

忽如若一作歸

同前

袁淑

劍騎何翩翩長安五陵間秦地天下樞八方湊才賢荆
魏多壯士宛洛富少年意氣深自負肯事郡邑權籍籍
關外來車徒傾國鄼五侯競書幣羣公亟為言義分明
於霜信行直如弦交歡池陽下留宴汾陰西一朝許人
諾何能坐相捐影節去函谷投佩出甘泉嗟此務遠圖

心為四海懸但營身意遂宣校耳目目前俠烈良有聞古
來共知然

同前

鮑照

白馬駢角弓鳴鞭乘北風要途問邊急雜虜入雲中閉
壁自往夏清野逐還冬僑裝多闕絕旅服少裁縫埋身

守漢境

一作節

沉命對胡封薄莫塞

一作雪

雲起飛沙被遠

松含悲望兩都楚歌登四墉丈夫設計誤懷恨逐邊戎

棄

一作罷

別中國愛要冀胡馬功去來今何道單賤生所

鍾但令塞上兒知我獨為雄

同前二首

孔稚圭

驥子跼且鳴鐵陣與雲平漢家嫖姚將馳突匈奴庭少年鬪猛氣怒髮為君征雄戟摩白日長劒斷流星早出飛狐塞晚泊樓煩城虜騎四山合胡塵千里驚嘶笳振地響吹角沸天聲左碎呼韓陣右破休屠兵橫行絕漠表飲馬瀚海清

一作汀

隴樹枯無色沙草不常青勒石燕

然道凱歸長安亭縣官知我健四海誰不傾但使彊戎

滅何須甲第成當令丈夫志獨為上古英

白馬金貝裝橫行遼水旁問是誰家子宿衛羽林郎文

犀六屬鎧寶劍七星光山虛弓響徹地迴角聲長宛河

推勇氣隴蜀擅威疆輪臺受降虜高闕翦名王射熊入

飛觀校獵下長楊英名欺衛霍智策蔑平良島夷時失

禮弁服犯邊疆徵兵集薊北輕騎出漁陽進軍隨日暈

挑戰逐星芒陣移龍勢動營開虎翼張衝冠入死地攘

臂越金湯塵飛戰鼓急風交征旆揚轉鬪平華地追奔

掃帶方本持身許國况復武功彰會令千載後流譽滿
旂常

同前

沈約

白馬紫金鞍停鑣過上闌寄言狹斜子詎知隴道難赤
坂途三折龍堆路九盤冰生肌裏冷風起骨中寒功名
志所急日莫不遑飡長驅入右地輕舉出樓蘭直去已
垂涕寧可望長安匪期定遠封無羨輕車官唯見恩義
重豈覺衣裳單本持軀命答幸遇身名完

同前

王僧孺

千里生冀北玉鞘黃金勒散蹄去無已
搖頭意相得豪氣發西山雄風擅東國
飛鞚出秦隴長驅繞岷楚承謨若有神
稟算良不惑滌汨河水黃參差嶂雲黑
安能對兒女垂帷弄毫墨兼弱不稱雄
後得方為特主眷亦何已君恩良未塞
不許跨天山何由報皇德

同前

徐悝

研蹄飾鏤鞍飛鞚度河干少年本上郡
遨遊入露寒劍

琢荆山玉彈把隋珠丸聞有邊烽急飛候至長安然諾
竊自許捐軀諒不難占兵出細柳轉戰向樓蘭雄名盛
李霍壯氣勇彭韓能令石飲羽復使髮衝冠要功非汗
馬報効乃鋒端日沒塞雲起風悲胡地寒西征馘小月
北去腦烏丸歸報明天子燕然石復刊

同前

王胄

白馬黃金鞍蹀躞柳城前問此何鄉客長安惡少年結
髮從戎事馳名振朔邊良弓控繁弱利劍揮龍泉披林

扼彫虎仰手接飛鳶前年破沙漠昔歲取祁連折衝摧
右校牽旗殪左賢虎彌還謝力慶忌本推僂海外平遐
險來庭識負褰三韓勞薄伐六事指幽燕良家選河右
猛將征西山浮雲屯羽騎蔽日引長旃自矜有餘勇應
募忽爭先王師已得雋夷首失求全鼓行徇玉檢乘勝
蕩朝鮮志勇期功立寧憚微軀捐不羨山河賞唯希竹
素傳

同前

辛得源

任俠重芳辰相從競逐春金羈絡楮汗紫縷應

一作紫陌映紅

塵紅塵寶劍提

一作橫

三尺雕弓韜六鈞鳴珂蹀細柳飛

蓋出宜春遙見浮光

一作雲

發懸知上頭人

同前

李白

龍馬花雪毛金鞍五陵豪秋霜切玉劍落日明珠袍鬪
雞事萬乘軒蓋一何高弓推宜山虎手接太山猿酒後

競風彩三杯弄寶刀殺人如翦草劇孟同遊遨發憤去

函谷從軍向臨洮叱咤萬戰場

一作經百戰

匈奴盡波濤歸

來使酒氣未肯拜蕭曹羞入原憲室荒徑隱蓬蒿

苦思行

曹植

綠蘿緣玉樹光曜粲相暉下有兩真人舉翅翻高飛我
心何踴躍思欲攀雲追鬱鬱西嶽顛石室青蔥與天連
中有耆年一隱士鬚髮皆皓然策杖從吾遊教我
要忘言

升天行二首

曹植

樂府解題曰升天行曹植云日月何時留

鮑照云家世宅關輔曹植又有上仙錄與
神遊五遊龍欲升天等篇皆傷人世不永
俗情險艱當求神仙翱翔六合之外與飛
龍仙人遠遊篇前緩聲歌同意按龍欲升
天即當牆欲高行也

乘蹻追術士遠之蓬萊山靈液飛素波蘭桂上參天玄
豹遊其下翔鷗戲其顛乘風忽登舉彷彿一作彷徨見衆仙

扶桑之所出乃在朝陽谿中心陵蒼昊布葉蓋天涯日

出登東榦既夕沒西枝願得紆陽轡迴日使東馳

同前

鮑照

家世宅關輔勝帶官王城備聞十帝事委曲兩都情倦

見物興衰驟覩俗屯平翩翩

一作翩翩

類迴掌恍惚似朝榮

窮塗悔短計晚志愛長生從師入遠嶽結友事仙靈五

圖發金記九籥隱丹經風飡委松宿雲卧恣天行冠霞

登綵閣解玉飲

一作隱

椒庭暫遊越萬里近別數千齡鳳

臺無還駕蕭管有遺聲何時

一作當

與爾曹啄腐共吞腥

同前

劉孝勝

堯攀已徒說湯捫亦妄陳欲訪青雲侶正遇丹丘人少
翁俱仕漢韓終苦入秦汾陰觀化鼎瀛洲宴羽人廣成
參日月方朔問一作星辰驚祠伐楚樹射藥戰江神閻
闔皆曾倚太一豈難親趙簡猶聞樂周儲固上賓秦皇
多忌害元朔少寬仁終無良有以非關德不鄰

同前

盧思道

尋師得道訣輕舉厭人羣玉山侯王母珠庭謁老君煎

為返魂藥刻作長生文飛策乘流電彫軒曳白雲玄洲
望不極赤野曉無垠金樓旦巖嶮玉樹曉氛氲擁琴遙
可望吹笙遠詎聞不覺蜉蝣子死葬何紛紛

同前

僧齊己

身不沉骨不重驅青鸞駕白鳳幢蓋飄飄入冷空天風
瑟瑟星河動瑤闕參差阿母家樓臺戲閉凝彤霞五三
仙子乘龍車堂前碾爛蟠桃花回頭却顧蓬山頂一點
濃嵐在深井

雲中白子高行

傅 玄

陵陽子來明意欲作天與仙人遊超登元氣攀日月遂
造天門將上謁閭闔見紫微絳闕紫宮崔嵬高殿嵯
峨雙闕萬丈玉樹羅童女掣電童男挽雷車雲漢隨天
流浩浩如江河因王長公謁上皇鈞天樂作不可詳龍
仙神仙教我靈祕八風子儀與遊我祥我心何戚戚思
故鄉俯看故鄉二儀設張樂哉二儀日月運移地東南
傾天西北馳鶴五氣所補鼇四足所支齊駕飛龍驂赤

螭逍遙五嶽間東西馳長與天地並復何為復何為

樂府詩集卷六十三

欽定四庫全書薈要卷一萬九千七百七十七集部

樂府詩集卷六十四

宋 郭茂倩 編

雜曲歌辭

五遊

曹植

九州不足步願得凌雲翔逍遙八紘外遊目歷遐荒披
我丹霞衣襲我素霓裳華蓋紛掩藹六龍仰天驤曜靈
未移景倏忽造昊蒼閭闔啓丹扉雙闕曜朱光徘徊文

昌殿登陟太微堂上帝休西櫺羣后集東廂帶我瓊瑤
佩漱我沆瀣漿踟躕玩靈芝徙倚弄華芳王子奉仙藥
羨門進奇方服食享遐紀延壽保無疆

遠遊篇

曹植

楚辭遠遊章句曰悲時俗之迫阨兮願輕
舉而遠遊質菲薄而無因兮焉託乘而上
浮王逸云遠遊者屈原之所作也屈原履
方直之行不容於世困於讒佞無所告訴

乃思與仙人俱遊戲周歷天地無所不至
焉周王褒又有輕舉篇亦出於此

遠遊臨四海俯仰觀洪波大魚若曲陵承浪相經過靈
鼇戴方丈神嶽儼嵯峨仙人翔其隅玉女戲其阿瓊藥
可療飢仰漱吸朝霞崑崙本吾宅中州非我家將歸謁
東父一舉超流沙鼓翼舞時風長嘯激清歌金石固易
敝日月同光華齊年與天地萬乘安足多

輕舉篇

王褒

天地能長久神仙壽不窮
白玉東華檢方諸西嶽童
我瞻少海北暫別扶桑東
俯觀雲似益低望月如弓
看棋城邑改辭家墟巷空
流珠餘舊竈種杏發新叢
酒釀瀛洲玉劔鑄昆吾
銅誰能攬六博還當訪井公

仙人篇

曹植

樂府廣題曰秦始皇三十六年使博士為
仙真人詩遊行天下令樂人歌之曹植仙
人篇曰仙人攬六著言人生如寄當養羽

翼徘徊九天以從韓終王喬於天衢也齊
陸瑜又有仙人覽六著篇蓋出於此

仙人攬六著對博太山隅湘娥拊琴瑟秦女吹笙竽玉
樽盈桂酒河伯獻神魚四海一何局九州安所如韓終
與王喬要我於天衢萬里不足步輕舉凌太虛飛騰踰
景雲高風吹我軀迴駕觀紫微與帝合靈符閭闔正嵯
峨雙闕萬丈餘玉樹扶道生白虎夾門樞驅風遊四海
東過王母廬俯觀五嶽間人生如寄居潛光養羽翼進

趣且徐徐不見昔軒轅升龍出鼎湖徘徊九天下與爾
長相須

仙人覽六著篇

陸瑜

九仙會歡賞六著且娛神戲谷聞餘地銘山憶舊秦避
敵情思巧論兵勢重新問取南皮夕還笑拂碁人

神仙篇

王融

命駕瑤池側

一作隈

過息羸女臺長袖何靡靡簫管清且

哀璧門涼月舉珠殿秋風迴青鳥驚高羽王母停玉杯

舉手慙為別，千年將復來。

同前

戴嵩

徒聞石為火，未見坂停丸。
暫數盈虛月，長隨晝夜瀾。
辭家試學道，逢師得姓韓。
閭山金靜室，蓬丘銀露壇。
安平醞仙酒，渤海轉神丹。
初飛喜退鳳，新學法乘鸞。
十芒生月腦，六燄起星肝。
瓊播疑俗信，玉類陽官玄。
都宴晚集紫府事，朝看謝手今。
為別進憐此，俗難

同前

張正見

瀛州分渤海閭苑隔虹蜺欲識三山路須尋千仞溪石
梁雲外去蓬丘霧裏迷年深毀丹竈學久棄青泥葛水
留還杖天衢鳴去雞六龍驤首起雲閣萬里一別何寥
廓玄都府內駕青牛紫蓋山中乘白鶴尋陽杏花終難
朽武陵桃花未曾落已見玉女笑投壺復覩仙童欣六
博同甘玉文棗俱飲流霞藥鸞歌鳳舞集天台金闕銀
宮相向開西王已令青鳥去東海還馭赤虬來魏武還
車逢漢女荆王因夢識陽臺鳳蓋隨雲聊蔽日霓裳雜

雨復乘雷神嶽吹笙遙謝手當知福地有神才

同前

盧思道

浮生厭危促名嶽共招攜雲軒遊紫府風駟上丹梯時
見遼東鶴屢聽淮南雞玉英持作寶瓊實採成蹊飛策
揚輕電懸旌耀彩蜺瑞銀光似燭靈石髓如泥寥廓鸞
山右超越鳳洲西一丸應五色持此救人迷

同前

魯范

王遠尋仙至藥巴訪術迴乘空向紫府控鶴下蓬萊霜

分白鹿駕日映流霞杯煎金丹未熟醒酒藥初開乍應
觀海變誰肯畏年積

神仙曲

李賀

碧峰海面藏靈書上帝揀作神仙居晴時笑語聞空虛
鬪乘巨浪騎鯨魚春羅剪字邀王母共宴紅樓最深處
鶴羽衝風過海遲不如卻使青龍去猶疑王母不相許
垂露娃髮更傳語

昇仙篇

梁簡文帝

少室堪求道明光可學仙丹縉碧林宇綠玉黃金篇雲
車了無轍風馬詎須鞭靈桃恒可餌幾迴三千年

飛龍篇

曹植

楚辭離騷曰為余駕飛龍兮雜瑤象以為
車曹植飛龍篇亦言求仙者乘飛龍而昇
天與楚辭同意按琴曲亦有飛龍引

晨遊泰山雲霧窈窕忽逢二童顏色鮮好乘彼白鹿手
翳芝草我知真人長跪問道西登玉堂一作臺金樓復道

授我仙藥神皇所造教我服食還精補腦壽同金石永
世難老

應龍篇

張正見

張正見應龍篇言龍未起時乃在淵底藏
以諭君子隱居養志以待時也廣雅曰有
鱗曰蛟龍有翼曰應龍有角曰虬龍無角
曰螭龍

應龍未起時乃在淵底藏非雲足不蹈舉則冲天翔譬

彼野蘭草幽居常獨香清風播四遠萬里望芬芳隱居
可頤志自見焉得彰

鬪雞篇

曹植

春秋左氏傳曰季郈之雞鬪季氏介其雞
郈氏為之金距杜預云擣芥子播其羽也
或曰以膠沙播之為介雞鄴都故事曰魏
明帝大和中築鬪雞臺趙王石虎亦以芥
羽漆砂鬪雞于此故曹植詩云鬪雞東郊

道走馬長楸間是也

遊目極妙伎清聽厭宮商主人寂無為衆賓進樂方長
筵坐戲客鬪雞觀閒房羣雄正翕赫雙翅自飛揚揮羽
邀清風悍目發朱光甯落輕毛散嚴距往往傷長鳴入
青雲扇翼獨翱翔願蒙狸膏助常得擅此場

同前

劉孝威

丹雉翠翼張妬敵得專場翅中含芥粉距外耀金芒氣
踰上黨列名媿下鞞良祭橋愁魏后食跖忌齊王願賜

淮南藥一使雲間翔

盤石篇

曹植

盤石山巔石飄颻澗底蓬我本太山人何為客海東
藿葭彌斥土林木無分重岸巖若崩缺湖水何洶洶蚌蛤
被濱涯光彩如錦虹高彼凌雲霄浮氣象螭龍鯨脊若
丘陵鬚若山上松呼吸吞船櫂澎湃戲中鴻方舟尋高
價珍寶麗以通一舉必千里乘颶舉帆幢經危履險阻
未知命所鍾常恐沈黃墟下與鼃鼃同南極蒼梧野遊

眇窮九江中夜指參辰欲師當定從仰天長太息思想
懷故邦乘桴何所志于嗟我孔公

驅車篇

曹植

驅車揮駕馬東到奉高城神哉彼太山五嶽專其名隆
高貫雲霓嵯峨出太清周流二六候間置十二亭上有
涌醴泉玉石揚華英東北望吳野西眺觀日精魂神所
繫屬逝者感斯征王者以歸天效厥元功成歷代無不
遵禮祀有品程探策或長短唯德享利貞封者七十帝

軒皇元獨靈，食霞漱沆瀣。毛羽被身形，發舉蹈虛廓。徑
廷升窈冥，同壽東父年。曠代永長生。

種葛篇

曹植

種葛南山下，葛藟自成陰。與君初婚時，

一作初定婚

結髮恩

義深歡愛在，枕席宿昔同。衣衾竊慕棠棣篇，好樂和瑟
琴。行年將晚，莫佳人懷異心。恩紀曠不接，我情遂抑沈。
出門當何顧，徘徊步北林。下有交頸獸，仰見雙棲禽。攀
枝長歎息，淚下沾羅襟。良馬知我悲，延頸代我吟。昔為

同池魚今為商與參往古皆歡遇我獨困於今棄置委
天命悠悠安可任

秋蘭篇

傅玄

秋蘭本出於楚辭離騷云秋蘭兮麝蕪羅
生兮堂下綠葉兮素華芳菲菲兮襲予蘭
香草言芳香菲菲上及於我也傅玄秋蘭
篇云秋蘭蔭玉池池水且芳香其旨言婦
人之託君子猶秋蘭之蔭玉池與楚辭同

意

秋蘭蔭玉池池水且芳香芙蓉隨風發中有雙鴛鴦雙
魚自湧躍兩鳥時迴翔君其一作歷九秋與妾同衣裳

松柏篇

鮑照

松柏篇鮑照擬傅玄樂府龜鶴篇而作也

松柏受命獨歷代長不衰人生浮且脆歟若晨風悲東
海迸逝川西山道落暉南郭悅籍短蒿里收水歸諒無
疇昔時百病起盡期志士惜牛刀忍勉自療治傾家行

藥事顛沛去迎醫徒備火石苦奄至不得辭龜齡安可
獲岱宗期已迫睿聖不得留為善何所益捨此赤縣居
就彼黃墟宅永離九原親長與三辰隔屬續生望盡闔
棺世業埋事痛存人心恨結亡者懷祖葬既云及壙塚
亦已開室族內外哭親疎同共哀外姻遠近至名列通
夜臺扶輿出殯宮低迴戀庭室天地有盡期我去無還
日居者今已盡人事從此畢火歇煙既沒形銷聲亦滅
鬼神來依我生人永辭訣大莫杳悠悠長夜無時節鬱

堙重冥下煩冤難具說安寢委沉寔戀戀念平生事業
有餘結形迹未及成資儲無甌石兒女皆孩嬰一朝放
捨去萬恨纏我情追憶世上事束教以自拘明發靡怡
念夕歸多憂虞撤閑晨逕流輟宴式酒儒知今瞑目苦
恨失爾時娛遙遙遠民居獨埋深壤中墓前人跡滅冢
上草日豐空牀響鳴蛸高松結悲風長寐無覺期誰知
逝者窮生存處交廣連榻舒華裯已沒一何苦楛哉不
容身昔日平居時晨夕對六親今日掩奈何一見無諧

因禮席有降殺三齡速過隙几筵就收撤室宇改疇昔
行女遊歸途仕子復王役家世本平常獨有亡者劇時
祀望歸來四節靜瑩丘孝子撫墳號父兮知來不欲還
心依戀欲見絕無由煩冤荒隴側肝心盡崩抽

采菊篇

梁簡文帝

月精麗草散秋株洛陽少婦絕妍姝相喚一作呼提筐采
菊珠朝起露濕霑羅襦東方千騎從驪駒豈不下山逢

故夫

飛塵篇

傅玄

飛塵穢清流朝雲蔽日光秋蘭豈不芬鮑肆亂其芳河
決潰金堤一手不能障

閭闔篇

梁武帝

張衡西京賦曰表燒闕於閭闔閭闔闔天門
也立高闕以象之辭綜云紫微宮門名曰
閭闔也閭闔篇蓋出於此

西漢本佳妍金馬望甘泉衛尉屯兵上期門曉漏傳猶

重河東賦欲以

一作知

追神仙羽騎凌雲轉閭闔帶空懸

長旗掃月窟鳳迹輾星躔但使丹砂就能令億萬年

登名山行

名山本鎮地迢遞上凌霄雲披金澗近霧起石梁遙翠
微橫鳥路珠樹拂星橋風急清溪晚霞散赤城朝寓日
幽棲客駕言尋綺季跡絕桃源士忘情漆園吏沈冥負
俗心疎索凌雲意蒼蒼聳極天伏眺盡山川疊峰如積
浪分崖若斜煙淺深聞渡雨輕重聽飛泉采藥逢三島

尋真遇九仙藏書凡幾代看傳已經年逝將追羽客千
載一來旋

西長安行

傅玄

樂府解題曰西長安行晉傅休奕云所思
兮何在乃在西長安其下因叙別離之意
也三輔舊事曰長安城似北斗周地圖記
曰長安城南為南斗形北為北斗形通典
曰漢高帝自櫟陽徙都長安至惠帝方發

人徒築城即長安西北古城是也

所思兮何在乃在西長安何用存問妾香橙雙珠環何
用重存問羽爵翠琅玕今我兮問君更有兮異心香亦
不可燒環亦不可沈香燒日有歇環沉日自深

齊謳行

陸機

漢書曰漢王至南鄭諸將及士卒皆歌謳
思東歸顏師古曰謳齊歌也謂齊聲而歌
或曰齊地之歌禮樂志曰齊古謳員六人

梁元帝纂要曰齊歌曰謳是也陸機齊謳
行備言齊地之美亦欲使人推分直進不
可妄有所營也

營丘負海曲沃野爽且平洪川控河濟崇山入高冥東
被姑尤側南界聊攝城海物錯萬類陸產尚千名孟諸
吞楚夢百二倅秦京惟師恢東表桓后定周傾天道有
迭代人道無久盈鄙哉牛山歎未及至人情爽鳩苟已
徂吾子安得停行行將復去長存非所營

同前

沈約

東秦稱右地川隰固夷袒層峰駕蒼雲濁河流素壤青
丘良杳鬱雪宮信疏散王佐改殷命霸功繆周網

齊歌行

陸厥

黃金徒滿籬不如守章句雪宮紛多士稷下岌成覆一作

露同載雙連珠一作璧合席懸河注垂帷五行下操筆百

金賦華屋大車方高門駟馬驅玄豹空不食南山隱雲

霧

吳趨行

陸機

崔豹古今註曰吳趨行吳人以歌其地陸
機吳趨行曰聽我歌吳趨趨步也

楚妃且勿歎齊娥且莫謳四坐並清聽聽我歌吳趨吳
趨自有始請從閭門起閭門何嵯峨飛閣跨通波重藥
承遊極迴軒啟曲阿藹藹慶雲被泠泠鮮風過山澤多
藏育土風清且嘉泰伯導仁風仲雍揚其波穆穆延陵
子灼灼光諸華王迹積陽九帝功興四遐大皇自富春

矯首頓世羅邦彥應運興粲若春林葩屬城咸有士吳
邑最為多八族未足侈四姓實名家文德熙淳懿武功
侔山河禮讓何濟濟流化自滂沲淑美難窮紀商權為
此歌

同前

璽滿葢重簾唯有遠相思藕葉清朝釧何見早歸
時

一作還

同前

梁元帝

水裏生蔥翅池心恒欲飛蓮花逐牀返何時乘舸歸

會吟行

謝靈運

樂府解題曰會吟行其致與吳趨同會謂
會稽謝靈運會吟行曰咸共聆會吟

六引緩清唱三調佇繁音列筵皆靜寂咸共聆會吟會
吟自有初請從文命敷敷績壺冀始刊木至江汜列宿
炳天文負海橫地理連峰競千仞背流各百里漉池漉
粳稻輕雲暖松杞兩京愧佳麗三都豈能似層臺指中

天高墉積崇雉飛燕躍廣途鷓首戲清沚肆呈窈窕容
路曜嫵娟子自來彌世代賢達不可紀句踐善廢興越
叟識行止范蠡出江湖梅福入城市東方就旅逸梁鴻
去桑梓牽綴書土風辭殫意未已

樂府詩集卷六十四

欽定四庫全書薈要卷一萬九千七百七十八集部

樂府詩集卷六十五

宋 郭茂倩 編

雜曲歌辭

北風行

鮑照

北風本衛詩也北風詩曰北風其涼雨雪
其雱傳曰北風寒涼病害萬物以喻君政
暴虐百姓不親也若鮑照北風涼李白燭

龍棲寒門皆傷北風雨雪而行人不歸與

衛詩異矣

北風涼雨雪雱京洛女兒多嚴妝遙豔帷中自悲傷沉

吟不語若為一作忘問君何行何當歸苦使妾坐自傷

悲慮年至一作慮顏衰情易復恨難追

同前

李白

燭龍棲寒門光曜猶旦開日月照之何不及此唯有北

風號怒天上來燕山雪花大如席片片吹落軒轅臺幽

州思婦十二月停歌罷笑雙蛾推倚門望行人念君長
城苦寒良可哀別時提劍救邊去遺此虎文金髀釵中
有一雙白羽箭蜘蛛結網生塵埃箭空在人今戰死不
復迴不忍見此物焚之已成灰黃河捧土尚可塞北風
雨雪恨難裁一作
哉

苦熱行

鮑照

魏曹植苦熱行曰行遊到日南經歷交趾
鄉苦熱但曝露越夷水中藏樂府解題曰

苦熱行備言流金礫石火山炎海之艱難
也若鮑照云赤阪橫西阻火山赫南威言
南方瘴癘之地盡節征伐而賞之太薄也

赤阪橫西阻火山赫南威身熱頭且痛烏墮魂未歸湯
泉發雲潭焦煙起石磯日月有恒昏雨露未嘗晞丹蛇
踰百尺元蜂盈十圍含沙射流影吹蠶病行暉瘴氣晝
重體茵露夜霑衣飢援莫下食晨禽不敢飛毒涇尚多
死渡瀘寧具腓生軀蹈死地昌志登一作高禍機戈船榮

既薄伏波賞亦微爵輕君尚惜士重安可希

同前

梁簡文帝

六龍驚不息三伏起炎陽寢興煩几案俯仰倦幃牀滂
池汗似鑠微靡風如湯洄池愧玉浪蘭殿非含霜細簾
時半卷輕幌乍橫張雲斜花影沒日落荷心香願見洪
崖井詎憐河朔觴

同前

任昉

旭旦煙雲卷烈景入東軒傾光望轉蕙斜日照西垣既

卷蕉梧葉復傾葵藿根重葦無冷氣挾石似懷溫霖霖
類珠綴喘嚇狀雷奔

同前

何遜

昔聞草木焦今覩沙石爛曠曠風愈靜瞳瞳日漸旰習
靜悶衣巾讀書煩几案卧思清露浥坐待明星燦蝙蝠
戶間飛蠖蟻窗中亂會無河朔飲室有臨淄汗遺金自
不拾惡木寧無榦願以三伏辰催促九秋換

同前

庾信

火井沈熒散炎洲高燄通鞭石未成雨鳴鳶不起風思
為鸞翼扇願備明光宮臨淄迎子禮中散就安豐美酒
含蘭氣甘瓜開蜜筒寂寥人事屏還得隱牆東

同前

王維

赤日滿天地火雲成山嶽草木盡焦卷川澤皆竭涸輕
紈覺衣重密樹苦陰薄莞簟不可近絺綌再三濯思出
宇宙外曠然在寥廓長風萬里來江海蕩煩濁却顧身
為患始知心未覺忽入甘露門宛然清涼樂

同前

王穀

祝融南來鞭火龍
火旗焰焰燒天紅
日輪當午凝不去
萬國如在洪爐中
五嶽翠乾雲彩滅
陽侯海底愁波竭
何當一夕金風發
為我掃却天下熱

同前

僧皎然

六月金數伏
茲辰日在庚
炎曦曝肌膚
毒霧昏檐楹
安得奮翅翮
超遙出雲征
不知天地心
如何匠生成
火德燒百卉
瑶草不及榮
省客當此時
忽貽懷中瓊
捧翫煩

袂滌嘯歌美風生遲君佐元氣調使四序平中令霜不
袂火餘氣常貞江南詩騷客休吟苦執行

同前

僧齊己

離宮劃開赤帝怒喝起六龍奔日馭下土熬熬若煎煮
蒼生惶惶無處處火雲崢嶸焚沈寥東臯老農腸欲焦
何當一雨蘇我苗為君擊壤歌帝堯

太行苦執行

劉長卿

迢迢太行路自古稱險惡千騎嚴欲前羣峰望如削火

雲從中起仰視飛鳥落汗馬卧高原危旌倚長薄清風
何不至赤日方煎爍石露山木焦鱗窮水泉涸九重今
旰食萬里傳明略諸將候軒車元兇愁鼎鑊何勞短兵
接自有長纓縛通越事豈難渡瀘功未博朝辭羊腸坂
夕望貝丘郭漳水斜遶營常山遙入幕永懷姑蘇下因
寄建安作白雪和誠難滄波意空託陳琳書記好王粲
從軍樂早晚歸漢庭隨君上麟閣

同前

獨孤及

駟馬上太行修途亘遼碣王程無留駕日昃未遑歇請
問此何時恢台朱明月長蛇稽天討上將方北伐明主
命使臣皇華得時傑已忘羊腸險豈憚溫風熱搖策汗
滂沱登崖思紆結炎雲如煙火溪谷將恐竭晝景艷可
畏涼颼何由發山長飛鳥墮目極行車絕趙魏方倣擾
安危俟明哲歸路豈不懷飲冰有苦節會同傳檄至疑
議立談決況有阮元瑜翩翩秉書札起予歌赤坂永好
踰白雪誰念剖竹人無因執羈紲

春日行

鮑照

獻歲發春吾將行春山茂春日明園中鳥多嘉聲梅始
發柳始青汎舟艫齊棹驚奏採菱歌鹿鳴風微起波微
生一作微波起微風生弦亦發酒亦傾入蓮池折桂枝芳袖動芬
葉披兩相思兩不知

同前

李白

深宮高樓入紫清金作蛟龍盤繡楹

一作繡作楹

佳人當窗

弄白日弦將手語彈鳴箏春風吹落君王耳此曲乃是

升天行因出天池汎蓬瀛樓船感沓波浪驚三千雙蛾
獻歌笑搗鐘考鼓宮殿傾萬姓聚舞歌太平我無為人
自寧三十六帝欲相迎仙人飄翩下雲輶帝不去留鎬
京安能為軒轅獨往入窅冥小臣拜獻南山壽陛下萬
古垂鴻名

同前

張籍

春日融融池上暖竹牙出土蘭心短草堂晨起酒半醒
家僮報我園已滿頭上皮冠未曾整直入花間不尋徑

樹樹殷勤盡遶行舉枝未遍春日暝不用積金著青天
不用服藥求神仙但願園裏花長好一生飲酒花前老

朗月行

鮑照

朗月出東山照我綺窗前窗中多佳人被服妖且妍靚
妝坐帷裏當戶弄清弦鬢奪衛女迅體絕飛燕先為君
歌一曲當作朗月篇一作堂上朗月篇酒至顏自解聲和心亦
宣千金何足重所存意氣閒

同前

李白

小時不識月呼作白玉盤又疑瑤臺鏡飛在青雲端
仙人垂兩足桂樹作團團白兔擣藥成問言與誰餐蟾蜍
蝕園影天明夜已殘羿昔落九烏天人清且安陰精此
淪惑去去不足觀憂來其如何惻愴摧心肝

明月篇

傅玄

皎皎明月光灼灼朝日暉昔為春蠶絲今為秋女衣丹
脣列素齒翠彩發蛾眉嬌子多好言歡合易為姿玉顏
盛有時秀色隨年衰常恐新間舊變故興細微浮萍本

無根

一作浮萍
無根本

非水將何依
憂喜更相接
樂極還自悲

明月子

謝 變

杪秋之遙夜
明月照高樓
登樓一迴望
望見東

一作南

陌

頭故人眇千里
言別歷九秋
相思不相見
望望空離憂

堂上歌行

鮑 照

四坐且莫

一作勿

誼聽我堂上歌
昔仕京洛時
高門臨長

河出入重宮裏
結友曹與何
車馬相馳逐
賓朋好容華

陽春孟春月
朝光散流霞
輕步逐芳風
言笑弄丹葩
暉

暉朱顏醜紛紛織女梭滿堂皆美人目成對湘娥雖謝
侍君閒明妝帶綺羅箏笛更彈吹高唱好相和萬曲不
關情心一作一曲動情多欲知情厚薄更聽此聲過

前有一樽酒行

傅玄

置酒結此會主人起行觴玉樽兩楹間絲理東西廂舞
袖一何妙變化窮萬方賓主齊德量欣欣樂未央同享
千年壽朋來會此堂

同前

陳後主

殿高絲吹滿日落綺羅鮮莫論朝漏促傾卮待夕筵

同前

張正見

前有一樽酒主人行壽今日合來坐者當今皆富且壽
欲令主人三萬歲終歲不知老為吏當高遷賈市得萬
倍桑蠶當大得主人宜子孫

同前二首

李白

春風東來忽相過金樽綠酒生微波落花紛紛稍覺多
美人欲醉朱顏酡青軒桃李能幾何流光欺人忽蹉跎

君起舞日西夕當年意氣不肯傾白髮如絲歎何益
琴奏龍門之綠桐玉壺美酒清若空催弦拂柱與君飲
看朱成碧顏始紅胡姬貌如花當壚笑春風笑春風舞
羅衣君今不醉欲安歸

前緩聲歌

古辭

晉陸機前緩聲歌曰游仙聚靈族高會曾
城阿言將前慕仙遊冀命長緩故流聲於
歌曲也宋謝惠連又有後緩聲歌大略戒

居高位而為讒諂所蔽與前歌之意異矣
按緩聲本謂歌聲之緩非言命也又有緩
歌行亦出於此

水中之馬必有陸地之船但有意氣不能自前心非木
石荊根株數得覆蓋天當復思東流之水必有西上之
魚不在大小但有朝於復來長笛續短笛欲今皇帝陛
下三千萬歲

同前

陸機

遊仙聚靈族高會曾城阿長風萬里舉慶雲鬱嵯峨
宓興洛浦王韓起太華北徵瑤臺女南要湘川娥肅肅
霄駕動翩翩翠蓋羅羽旗棲瓊鸞玉衡吐鳴和太容揮
高弦洪崖發清歌獻酬既已周輕舉乘紫霞總轡扶桑
枝一作底濯足暘谷波清輝溢天門垂慶惠皇家

同前

孔寧子

供帳設玄宮衆仙胥闕亞炤炤二儀曠雍容風雲暇北
伐太行鼓南整九疑駕笙歌興洛川鳴簫起秦榭鈞天

異三代廣樂非韶夏滿堂皆人靈列筵必羽化鳥可循
日留兔自延月夜弱水時一濯扶桑聊暫舍兆甸方履
端千齡閏八蜡

同前

沈約

羽人廣宵宴帳集瑤池東開筵泛綵靄澄霧迎香風龍
駕出黃苑帝服起河宮九疑轡煙雨三山馭螭鴻玉鑾
乃排月瑤輶信凌空神行燭玄漠帝旆委曾虹簫歌笑
羸女笙吹悅姬童瓊漿且未洽羽轡已騰空息鳳曾城

曲滅景清都中降祐集皇代委祚溢華嵩

同前

謝惠連

羲和織阿去嵯峨覩物知命使余轉欲悲歌憂戚人心
胸處山勿居峰在行勿為公居峰大阻銳為公遇讒蔽
邪琴自踈越雅韻能揚揚滑滑相混同終始福祿豐

緩歌行

謝靈運

飛客結靈友凌空萃丹丘習習和風起采采彤雲浮娥
皇發湘浦霄明出河洲宛宛連螭轡喬喬振龍旒


同前

李頎

小來託身攀貴遊，傾財破產無所憂。莫擬經過石渠署，
朝將出入銅龍樓。結交杜陵輕薄子，謂言可生復可死。
一沉一浮會有時，棄我翻然如脫屣。男兒立身須自彊，
十五閉戶潁水陽。業就功成見明主，擊鐘鼎食坐華堂。
二八蛾眉梳墮馬，美酒清歌曲房下。文昌宮中賜錦衣，
長安陌上退朝歸。五侯賓從莫敢視，三省官寮揖者稀。
早知今日讀書是，悔作從來任俠非。



樂府詩集卷六十五



總校官進士臣胡榮

校對官庶吉士臣徐如澍

謄錄監生臣張孝基